

FOULKES, THOMAS (1731 - 1802), cyngorwr Methodistiaidd bore

Enw: Thomas Foulkes
Dyddiad geni: 1731
Dyddiad marw: 1802
Priod: Lydia Foulkes (née Lloyd)
Priod: Jane Foulkes
Priod: Margaret Foulkes (née Jones)
Plentyn: Lydia Jones (née Foulkes)
Plentyn: Sarah Roberts (née Foulkes)
Rhyw: Gwryw
Galwedigaeth: cyngorwr Methodistiaidd bore
Maes gweithgaredd: Crefydd
Awdur: Robert Thomas Jenkins

Ganwyd ym mhlwyf Llandrillo (Edeirnion), ond tua'r 23 oed aeth i weithio fel saer coed yn sir Gaerlleon. Ymunodd â seiat Wesleiaidd yn Neston, a themlodd yn ddwys dan bregeth gan John Wesley yn 1756. Yn fuan wedyn symudodd i'r Bala, lle nad oedd Wesleiaeth; ymdaflodd yntau i gyngori gyda'r Methodistiaid Calffaidd. Eto ni phallodd ei serch at Wesley a Wesleiaeth; credir mai ef a dalodd am gyhoeddi cyfieithiadau **John Evans o Brif Feddyginiaeth Wesley** yn 1759 ac o *Reolau ... yr Unol Gymdeithasau* yn 1761. Priododd deirgwaith, a phob tro fe'i cysylltodd ei hun â theluoedd pwysig yn hanes Methodistiaeth Cymru. Ei wraig gyntaf (1758) oedd Margaret, ferch Humphrey Jones, dilledydd cefnog yn y Bala, un o ohebwy'r **Howel Harris**, ac efallai prif golofn Methodistiaeth gynnar y dre; bu hi farw 1759. Yn 1761, priodwyd Foulkes â Jane, gweddw David Jones a mam Sarah a ddaeth wedyn yn wraig (1783) i **Thomas Charles**; bu farw Jane Foulkes yn 1785. Ei drydedd wraig oedd Lydia, merch i **Simon Lloyd**, chwaer i **Simon Lloyd** (1756 - 1836), a gweler yr ysgrif ar **John Foulkes Jones**. Rhag cydymgais fasnachol â'i lysferch Mrs. Charles, symudodd Foulkes i Fachynlleth, lle y llwyddodd yn dda; daliodd yn gyngorwr teithiol gyda'r Methodistiaid Calffaidd ac yr oedd yn wr hynod elusengar. Bu farw ym Machynlleth 15 Mai 1802; pregethodd **Thomas Charles** a **John Evans** yn ei angladd. Wythnos cyn ei farw daeth **Owen Davies** a **John Hughes** i'r dref ar ran y genhadaeth Wesleiaidd Gymraeg newydd - odid nad arbedwyd Foulkes felly rhag dewis a fuasai'n anodd iddo.

Awdur

Yr Athro Emeritus Robert Thomas Jenkins, (1881 - 1969)

Ffynonellau

'Gwilym Lley'n,' yn *Y Traethodydd*, 1850

D. E. Jenkins, *Life of Thomas Charles* (Dinbych 1908), i, 143-5 (a throer i'r fynegai)

A. H. Williams, *Welsh Wesleyan Methodism, 1800-1858 its origins, growth and secessions* (1935), 33-6

Darllen Pellach

J. Morgan Jones a W. Morgan, *Y Tadau Methodistiaidd (1895-1897)*, ii, 90-98

Delweddau

Hugh Hughes, *Lydia Jones: Mother of the Reverend John Foulkes Jones*

Dolenni Ychwanegol

Wikidata: Q20733055

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.

frannu

Arddull APA

x

Preifatrwydd a Chwciis
Hawffraint
Y Prosiect
Cymorth
Cysylltu

LGC
NLW

LLYFRGEL
THE NATION



Yn ddiwedd
Llywodraeth Cymru
Supported by
Welsh Government